

**Sapaatip akunneranik pujortarnaveersaarfimmik pilersitsinissaq anguniaqqullugu
Naalakkersuisut peqquneqarnissaannik Inatsisartut aalajangiiffigisassaattut
siunnersuut**

(Inatsisartunut ilaasortamit Hans Enoksenimit, Siumut, saqqummiunneqartoq)

pillugu

Ilaqutariinnermut Peqqissutsimullu Ataatsimiititaliap

ISUMALIUTISSIISSUTAA

Siunnersuutip aappassaaneerpeqarnissanut saqqummiunneqartoq

Ilaqutariinnermut Peqqissutsimullu Ataatsimiititaliap suliarinninnermini kingullermik ukuninnga inuttaqarpoq:

Inatsisartunut ilaasortaq Olga P. Berthelsen, Inuit Ataqatigiit, siulittaasoq
Inatsisartunut ilaasortaq Debora Kleist, Inuit Ataqatigiit, siulittaasup tullia
Inatsisartunut ilaasortaq Isak Hammond, Inuit Ataqatigiit
Inatsisartunut ilaasortaq Justus Hansen, Demokraatit
Inatsisartunut ilaasortaq Knud Kristiansen, Atassut
Inatsisartunut ilaasortaq Ruth Heilmann, Siumut
Inatsisartunut ilaasortaq Malik Berthelsen, Siumut

UKA 2012-imi ulloq 18. oktober 2012-imi siullermeerneqarnermi kingorna siunnersuut una Ilaqutariinnermut Peqqissutsimullu Ataatsimiititaliamut erseqqinnerusumik suliarineqartussanngorlugu innersuunneqarpoq. Tamatuma kingorna siunnersuut ataatsimiititaliamit misissorneqarpoq.

Siunnersuutip imarisaa siunertaalu

Aalajangiiffigisassatut siunnersuummi matumani siunnersuuteqartup kissaatigaa sapaatip akunneranik pujortarnaveersaarfimmik pilersitsinissaq Inatsisartunit taperserpeqassasoq.

Pujortartarnerup kingunipiliusa qitiutillugit sammineqarnissaanni sapaatip akunera pujortarfiunngitsoq ilaatinneqassaaq. Tamatumani aamma siunertarineqarluni pujortartartut amerlanerit pujortarunnaarsinnissaat aammalu ikinnerusut pujortartalernissaat.

Pujortartarnerup kingunipilui sapaatip akunnerani pujortarfiunngitsumi meeqqanut inuusuttunullu immikkut paasisitsiniutigineqartariaqartut siunnersuuteqartumit siunnersuutigineqarpoq.

Sapaatip akunnera pujortarfiunngitsoq ukiut tamaasa ingerlanneqartassasoq aammalu tamanna sapaatip akunnerani 15-imi pisassasoq siunnersuutigineqarpoq. Siunnersuutip akuersissutigineqarneratigut ukiumoortumik aningaasartuutaasussat 500.000 kr.-iusussatut siunnersuuteqartumit tagginneqarput.

Siunnersuutip Inatsisartunit siullermeerneqarnera

Naalackersuisut akissuteqaamminni siunnersuut taperserpaat, oqaatigaluguli sapaatip akunnera pujortarfiunngitsoq sapaatip akunneranut 22-mut inissinneqartariaqartoq. Siunnersuut partiinit tamanit taperserneqarpoq. Sapaatip akunnerata 22-ip pujortarfiunnginnissaa partiinit amerlanernit taperserneqarsinnaavoq.

Ataatsimiititaliap siunnersuummik suliarinninnera

Siunnersuut siullermeerneqarami tamakkiisumik taperserneqarmat ataatsimiititaliamit assut iluarisimaarneqarpoq.

Sapaatip akunnerup pujortarfiunngitsup qanoq ingerlanneqarsinnaaneranut siunnersuutiniq assigiinngitsunik partiit tamarmik saqqummiussipput. Siunnersuutit taakku suliareqqeqqullugit Naalackersuisut qinnuigineqarput.

Pujortartarnerup nunatsinni innuttanit atugaanerujussua ataatsimiititaliamit assut isumakulunnartinneqarpoq. Paasissutissat saqqummiunneqartut naapertorlugit nunatsinni innuttaasut inersimasut 66 %-ii pujortartarput. Ajoraluartumillu oqaatigineqartariaqarpoq pinaveersaartitsiniarluni assigiinngitsunik suliniuteqartoqaraluartoq inuusuttut pujortartartut ukiuni kingullerni amerleriarsimasut. Aammattaaq oqaatigineqartariaqarpoq nunatsinni pujortartartut ikilisinneqarnissaannik anguniakkat manna tikillugu iluatsiffiusimanngimmata.

Pujortartartut amerliartornerat unitsinneqassapat pinaveersaartitsiniutitut suliniutit annertusarneqarnissaat tamatumalu peqatigisaanik iliuuserineqarsinnaasut allat ingerlaavartumik isumaliutigineqarnissaat pisariaqartutut isigineqarpoq.

Pujortartarneq akiorniarlugu Naalackersuisut iliuutsiminnik annertusaanerat ataatsimiititaliamit taperserneqarpoq aammalu *2012-2013-imi pujortartarnerup pinaveersimatinnissaa pillugu periusissiaq* saqqummiunneqaqqammersoq tikilluaqquneqarpoq.

Pujortartarnermut tunngatillugu pinaveersaartitsiniutitut iluatsitsiviullaanngitsumik

iliuserineqartarsimasut ilinniutigalugit pujortartarnerup akiorneqarnissaanut periuserisassat pinaveersaartitsiniutitullu iliuusissat qanimut malinnaavigineqarnissaat assut pingaaruteqartoq ataatsimiititaliaq isumaqarpoq, taamaaliornikkut pilertortumik pisariaqartitsinerlu malillugu iluarsiissuteqartoqarsinnaaqullugu.

Pujortartarunnaarneq pujortartartunut avatangiisiannullu pitsaasumik kinguneqartarpoq.

Inuusuttut pujortartalinnginnissaat soorunami qitiutillugu sammissavarput. Tamatumali peqatigisaanik pujortartartut pujortartarunnaarnermikkut peqqissutsimikkut aningaasaqarnermikkullu assut iluaquserneqarsinnaanerit aamma qitiutillugu sammissavarput. Aamma naartusut pujortartartut assut eqqumaffigineqassapput, pujortartarnermikkummi imminnut ajoqusernermik saniatigut naartortik ajoquserarmassuk.

Siunnersuutip aningaasatigut kingunissai

Siunnersuutip akuersissutigineqarneratigut ukiumoortumik aningaasartuutaasussat 500.000 kr.-iusussat siunnersuuteqartumit taggineqarput.

Pujortartarnerup atugaaqisup killilersimaarneqarnissaanik tamatta kissaatigisatsinnut aningaasalersuutissat naleqquttut tupanut akitsuutit isigineqarput, taakku 2011-mi nunatta karsianut 186 mio. kr.-inik isertitaqaataapput.

Tupanut akitsuutit amerlassusiisa aammalu pujortartartut amerlassusiisa akornanni ataqatigiinneq siunnersuutip aappassaaneerineqarnissaanut Naalakkersuisunit nassuiaatigineqarsinnaappat naleqqutissaaq. Ataatsimiititaliamit assersuutigalugu paaserusunneqarpoq pujortartarnerup pinaveersimatinnissaanut pujortartarnerlu akiorniarlugu iliutsinut aningaasalersuutissat akitsuutit ima qaffanneqarsinnaanersut inuit pujortartartut ikilisinneqarnissaannut naalakkersuinikkut anguniakkat anguneqarnissaat tassuunakkut qulakkeerneqarluni.

Ataatsimiititaliap inassuteqaatai

Siunnersuutip taamatut iluseqartillugu akuerineqarnissaa ataatsimiititaliamit isumaqatigiittumit inassutigineqarpoq.

Taama naatsunik oqaaseqarluni isumaliutissiissummilu allassimasut tunngavigalugit ataatsimiititaliap siunnersuut aappassaaniigassanngortippaa.

Olga P. Berthelsen,
Siulittaasoq

Debora Kleist

Isak Hammond

Justus Hansen

Knud Kristiansen

Ruth Heilmann

Malik Berthelsen